



Publicaziuns dalla vischnaunca, jamna 45

Votaziuns federalas e communalas dils 28 da november 2021

L'urna principala en casa communal a ei aviarta sco suonda:

Dumengia, ils 28-11-2021 9.00–11.00 La documentaziun da votar duess mintga votant/a haver obteniu. Cass cuntrari san ins s'annunziar immediat, denton **sil pli tard entochen venderdis, ils 26 da november 2021, allas 17.00**, tier l'administraziun communal (tel. 081 920 36 36).

Levgiament da votar

Mintga votant/a ha la pusseivladad da dar giu sia vusch a scret. En gliez mument sto el/ella observar il suandont:

1. Emplenir ora ils cedels da votar a maun e metter quels en la cuviarta da votar grischa e **serrar giu** ella.
2. Metter la cuviarta da votar grischa ensemen cun il certificat dil dretg da votar **suttascret** en la cuviarta alva, cun la quala Vus haveis obteniu la documentaziun da votaziun.
3. La cuviarta ch'ei adressada all'administraziun communal saveis Vus tarmetter cun posta (supplicau da francar) ni directamein fierer en la scaffa da brevs dalla casa communal. Ils cedels da votar ston esser sil pli tard la dumengia, ils 28 da november 2021, allas 11.00 tier l'administraziun communal.

Aschinavon ch'ei vegn buca risguardau sura instrucziuns da votar, ein ils cedels da votar nunvaleivels.

Suprastonza communal

Damonda da baghegiar

2021-1076.000

Datum dalla publicaziun: 12 da november 2021

Il patron: Swisscom (Schweiz) AG, Ringstrasse 32, 7001 Chur

Il representant: Hitz und Partner, Tiefenaustrasse 2, 3048 Worblaufen

Object: Sanaziun digl indrez da telefonia mobila per la Swisscom (Schweiz) AG, installaziun da novas antennas per las tecnologias 3G, 4G sco era 5G, parcella 2915, Runfoppa Sut, 7180 Disentis/Mustér

Protestas:

Ils plans da construcziun ein deponi tier l'administraziun communal. L'investa publica cuoza 20 dis dapi il datum dalla publicaziun. Eventualas protestas encunter sura damonda da baghegiar ein d'inoltrar a scret enteifer 20 dis all'istanza da baghegiar, caum postal 57, 7180 Disentis/Mustér. La protesta sto esser motivada e suttascretta dil recurrent ni da siu representant.

Disentis/Mustér, ils 12 da november 2021

Uffeci da baghegiar Disentis/Mustér

Annunzia da baghegiar

All'istanza da baghegiar ei sin fundament digl art. 64, alinea 2 dalla lescha da baghegiar e digl art. 40 dall'ordinaziun davart la planisaziun dil territori dil cantun Grischun OPT vegniu annunziou suandont project:

Nr. 2021-2095.000

STWEG Parz. 1344, Casa Cagliana, Via Sursilvana 18, 7180 Disentis/Mustér; sanaziun dil tetg, parcella 1344, Via Acla 1, 7180 Disentis/Mustér.

Disentis/Mustér, ils 12-11-2021

Uffeci da baghegiar Disentis/Mustér



Cussegl da vischnaunca

Il cussegl da vischnaunca seraduna **venderdis, ils 19 da november 2021**, allas 20.15 en halla Cons.

Tractandas:

1. Protocol 7-2021/2024
2. Preventiv 2022 (messadi nr. 14-2021/2024)
3. Ura da damondas (conform ad art. 44 dil regulativ da fatschentas)

Il president dil cussegl da vischnaunca

Scaldaments mobils el liber

Bulius da scaldar, radiators, radiators d'infratgietschen etc.

Sebasond sin art. 11, al. 2 dalla lescha cantunala d'energia en cumbinaziun cun art. 33 dall'ordinaziun cantunala d'energia ha il Departament da construcziun, traffic e selvicultura dil Grischun relaschau suandonta disposiziun:

1. Per mintga aparat da scaldar mobil – gas, electricidad ed ieli – che vegn duvraus el liber per intents commercials e che ha ina prestaziun da scaldar da maximalmein 14 kW sto vegnir cumpensau ina tonna CO². Per apparats cun ina prestaziun da sur 14 kW e cun ina prestaziun da scaldar maximala da 28 kW sto vegnir cumpensau duas tonnas CO² e per apparats cun ina prestaziun da scaldar maximala da sur 28 kW sto vegnir cumpensau treis tonnas CO² e.a.v. Silmeins 20% dall'immissiun CO² sto vegnir cumpensada en Svizra. Per scaldaments en tenda valan las medemas pretensiuns sco pils scaldaments el liber.

2. Per mintga tonna che sto vegnir cumpensada sto vegnir taccau ina vignetta vid igl aparat da scaldar. Ina vignetta vala mintgamai in onn naven digl 1. Da settember entochen ils 31 d'uost. L'obligaziun da cumprar ina vignetta exista naven dall'emprema gada ch'igl aparat da scaldar mobil vegn mess en funcziun durant la perioda da scaldar respectiva.

3. La cumpensaziun dall'immissiun da CO² succeda entras il possessur ni entras la vischnaunca.

4. Sch'ils possessurs cumpenseschan sezs l'immissiun da CO², vegn la vignetta concedida gratuitamein entras la vischnaunca. La cumpensaziun sto vegnir cumprovada cun in certificat d'ina interpresa specialisada sil sector dalla cumpensaziun da CO² (p.ex. Myclimate). Per apparats da scaldar electrici sa l'obligaziun da cumpensar l'immissiun da CO² era vegnir ademplida, sch'ei vegn applicau – per mintga tonna CO² che sto vegnir cumpensada – cumprovadamein 4500 kWh d'electricidad ch'ei vegnida producida cun energias regenerablas.

5. Sch'ils possessurs cumpenseschan buca sezs l'immissiun da CO², ston els cumprar tier la vischnaunca ina vignetta per mintga tonna CO² che sto vegnir cumpensada. Il prezi per vignetta importa **frs. 60.–**.

6. Las vischnauncas impundan igl entir recav dalla vendita da vignettas per cumpensar l'immissiun da CO². Igl uffeci d'energia e traffic metta a disposiziun in agid d'execuziun per las vischnauncas.

7. Per decretar sancziuns en cass da cuntravenziuns, en special incassar multas, ein las vischnauncas responsablas (art. 36 s. LEG).

Las vignettas san vegnir retratgas tier l'administraziun communal.

Disentis/Mustér, ils 17 da settember 2021

Administraziun communal



Fiera Sogn Martin

Gliendisdis, ils 15 da november 2021, ha liug sco mintg'onn l'usitada fiera da Sogn Martin. Ils stans vegnan endrizzai sin la Via Lucmagn. Las preparativas entras la vischnaunca entscheivan quei di allas 5.00 e la fiera ha liug naven dallas 8.00 entochen allas 17.00. Silsunter settracta ei da far uorden, quei che cuoza entochen ca. allas 19.00. Per evitar incaps supplichein nus las fatschentas el contuorn dils stans da fiera da sche pusseivel buca schar vegnir quei di autos cun pli grondas furniziuns.

Nus engraziein grondamein per la capientscha.

Uffeci da baghegiar

Seivs mobilas per la pasculaziun

Tenor art. 75, al. 1 dalla lescha da baghegiar ed art. 18 al. 1 dalla lescha d'agricultura ston tuttas seivs mobilas vegnir allontanadas **sil pli tard treis dis** suenter la pasculaziun. Quei vala era per seivs da gatter. Las seivs buc allontanadas vegnan pridas naven senza avisar ils pertuccai sin donn e cuost dil proprietari da terren.

Nus supplichein da prender enconuschientscha da quei fatg e d'instradar las mesiras prescettas.

Disentis/Mustér, november 2021

Uffeci da baghegiar ed infrastruttura

Tagliar caglias e plontas

Tenor art. 75, al. 4 dalla lescha da baghegiar astgan plontas buca disturbar la vischinonza ni la segirtad publica. Per liung dallas vias publicas e privatas sco era sendas ein tuttas caglias e plontas da tagliar anavos, aschia che nuot survarga il cunfin (era buca suenter ch'ei ha neviu). Quellas lavurs ston esser finidas sil pli tard entochen la **fin da november 2021**. En cass che las caglias e plontas vegnan buca tagliadas anavos enteifer il termin fixau, vegnan quellas lavurs exequidas entras il survetsch tecnic dalla vischnaunca cun adossar ils cuosts als proprietaris.

Disentis/Mustér, november 2021

Uffeci da baghegiar ed infrastruttura

Controlla da habitonts

Naschientscha

Elijah Alexi Monn, naschius igl 1. da november 2021, fegl da Jermae e Florian Monn



Corporaziun d'aua Spina da Vin, Disentis/Mustér

Invitaziun alla radunonza generala extraordinaria dalla Corporaziun d'aua Spina da Vin, **mardis, ils 16 da november 2021**, allas 20.00 el Center Fontauna, Sala Fontauna, Via Alpsu 51, 7180 Disentis/Mustér

Tractandas:

1. Beinvegni
2. Elecziun da dus dumbravuschs
3. Integraziun Corporaziun d'aua Las Fontaunas, Mumpé Medel
4. Orientaziuns
5. Varia

Tuttas commembras e tuts commembers ein cordialmein envidai e beinvegni. En connex cun Covid-19 han ils responsabels dalla Corporaziun d'aua Spina da Vin elaborau in concept da schurmetg per la radunonza generala extraordinaria. Quel sa vegnir cargaus giu sin nossa pagina d'internet sut www.spinadavin.ch.

Nus appellein als participonts d'esser precauts e setener vid las mesiras da schurmetg.

Corporaziun d'aua Spina da Vin
Per la suprastonza Il president: Aluis Flepp

Corporaziun d'aua «Las Fontaunas» Mumpé Medel

Radunonza extraordinaria, mardis, ils 16 da november 2021, allas 20.00 en casa da scola Segnas

Tractandas:

1. Beinvegni
2. Elecziun d'in dumbravuschs
3. Orientaziun per la soluziun dalla Corporaziun
4. Decisiun d'integraziun cun la Spina da vin
5. Varia

La suprastonza fa attent sin las prescripziuns da Covid-19, obligaziun da purtar mascrina.

Oz en biblioteca!

Kino da cudischs da maletgs cun Mats, la miur

Has ti plascher da vegnir en biblioteca e tedlar marvegliusas historias ord cudischs da maletgs? **Mintga secund venderdis** dil meins allas 14.30 legin nus avon e mussein vid ina gronda preit ils maletgs ord in cudisch da maletgs. L'occurrenza cuoza ca. in'ura ed ei adattada per tut ils affons che san gia tedlar tier bein. Naturalmein astgas ti era prender cun tei tia mumma ni in'otra persuna.

Nus selegrein zun fetg sin tei!

Cun ils pli cars salids *Mats, la miur ed il team dalla Biblioteca populara Disentis/Mustér e contuorn*

Ei vala igl obligatori da certificat per carschi. Il diember da participonts ei limitaus. Ina annunzia tochen gievgia da mezdi avon il termin dall'occurrenza ei necessaria: biblioteca@disentis.ch.



Preavis Seniora-Ca

Gievgia, ils 25 da november 2021, allas 12.00

Seniora-Ca envida ils seniors/las senioras dall'entira vischnaunca da Disentis/Mustér tier la tradiziunala sentupada ell'Aua Viva cun gentar (mo cun certificat).

Per l'annunzia mira «Fegl official» dils 19-11-2021.

Post d'informaziun Seniora-Ca
